

Uumasunut nakorsaatit pillugit Namminersornerullutik Oqartussat nalunaarutaat nr. 26, 14. november 2005-imeersaq

Nakorsaatit pillugit inatsisartut peqqussutaanni nr. 1-imi 12. maj 2005-imeersumi § 18, imm. 3, § 24, imm. 4, kiisalu § 25, imm. 2 aamma 3, naapertorlugit aalajangersarneqarput:

Atuuffissaa

§ 1. Nalunaarummi matumani malittarisaliuunneqarput uumasut nakorsaasa inuutissarsiutigalugu uumasuutigisanik nakorsaasersuisinnaanerat, tamatumunnga ilanngullugit uninngatitsigallartarnermut piffissaliussanut nakkutilliinermilu iliuusissanut maleruagassat.

Nalunaajarneqarneri

§ 2. Nersutaatit imatut paasineqassaaq uumasooq ataaseq imaluunniit uumasooqatigiit ataatsimoortut aalajangersimasumik siunertaqarluni inuussutissarsiordermi atorneqartut, nunap immikkoortuani aalajangersimasumiittut piginnittullillu.

Imm. 2. Uumasunik piginnittoq imaluunniit nersutiniq piginnittoq imatut paasineqassaaq inatsisit tunggavigalugit inuttulluunniit uumasuummik nersutaatinilluunniit piginnittutut akisussaasuusoq.

§ 3. Bakterianut akiuussutissaaq imatut paasineqassaaq nakorsaatit bakterianut akiuussutissamik akoorutissanillu katsorsaassutaasartunik imaqartut.

§ 4. Uumasunut nakorsaataasiviit imatut paasineqassaaq nakorsaataatit, uumasut nakorsaannit innersuussineq naapertorlugu uumasunut aalajangersimasunut nersutaatinilluunniit atorneqarnissaat siunertaralugu nersutaatinik piginnittumit inummilluunniit allamit toqqortaatigineqartut.

Nakorsaatit tigummigallartitsinissamik piffissaliiffiusussat

§ 5. Nakorsaatiniq tigummigallartitsinissamik piffissaliiffiusussanik atuinermi uumasuutit taakkunangalu tunisassiat tigummigallarneqarnissaat pillugit uumasut nakorsaat uumasuutilimmut imaluunniit nersutaatilimmut allakkatigut ilitseruussuussaaq.

Imm. 2. Tigummigallartitsinissamik nalunaarummi paasissutissat makku takuneqarsinnaassapput:

- 1) nappaatip suussusersinera,
- 2) uumasut suut, uumasullu qassit katsorsarneqarnerisut (paatsoorneqarsinnaanngitsumik sorliussusiliinerit imaluunniit tamanna ajornassappat amerlassutsit, oqimaassusiisa missiliorderi aamma uumasuusiviup immikkoortortaa imaluunniit assingusumik immikkoortiterisimaneq),
- 3) uumasut nakorsaata ulloq katsorsaaffia,

- 4) nakorsaat atorreqartoq,
- 5) nakorsaatip annertussusiliivigineqarnera qanorlu ilillugu nakorsaasersuutigineqarnera, aamma
- 6) tigummigallartitsinissaq pillugu nalunaarummi piffissaliussat.

Imm. 3. Uumasunut nakorsaatitut tunisassiaq pillugu allagartami akuerisaasumi annertussusiliussassatut taaneqartumit annertunerusumik nakorsaammik uumasuutitut atuinnermi uumasut nakorsaat tigummigallartitsinissamik naleqquttumik sivisunerusumik piffissaliissaaq, nakorsaatit timimi amiakkuusut tigummigallartitsinissamut piffissaliussaq qaangiuppatt annertunerpaaffissaattut killiussamik qaangiisimanninnissaat qulakkeerniarlugu.

§ 6. Nakorsaat pineqartoq uumasunik pineqartunik tigummigallartitsinissamut piffissaliiffiusimangippat uumasunut katsorsarneqartunut neqaannillu tunisassiassanik nerisassiassatulluunniit aalajangiussaasunik tigummigallartitsinissamut uumasut nakorsaat piffissaliissaaq. Tigummigallartitsinissamut piffissaliussaq, taamaattorli tak. imm. 2, sivikinnerpaamik:

- 1) toqoraanissaq sioqqullugu ullunik 28-nik sivisussuseqassaaq,
- 2) immuk tuniniarneqalertinnagu ullut unnuallu 7-t ingerlaqqaassapput,
- 3) manniit tuniniarneqalertinnagit ullut unnuallu 10-t ingerlaqqaassapput,
- 4) aalisakkat tuniniarneqalertinnagit ullut kiassusillit 500-t ingerlaqqaassapput, assersuutigalugu ullut 100-t imeq 5°C-mik kiassuseqartillugu.

Imm. 2. Imm. 1-mi tigummigallartitsinissamut piffissaliussat eqqarsaatigalugit taakku nul-umut inissinneqassapput, uumasunut nakorsaatit akiuussutissapajaatut sunniutillit akuutissaat sunniuteqartussat kimittussutsimikkut annerpaamik millionerarterummik annertussuseqarpata.

§ 7. Uumasut tigummigallartitsinissamut piffissaliinnermut ilaatinneqartut toqunneqartariaqartullu toqoraavimmut aatsaat tunniunneqarsinnaapput uumasut nakorsaannit toqoraqqusinnermik nalunaarummik ilaqartinneqarpata.

Nakorsaatit timimi amiakkuusut aamma tigummigallartitsinissamut piffissaliussat

§ 8. Nakorsaatit annerpaaffissatut killiliussaasimasut qaangerlugit uumasut timaanni amiakkoqartut paasineqarpat, tamatumunnga patsisaasoq paasiniarlugu uumasuni pinngorfiusoq imaluunniit uumasuutini nersutit pinngorfigisimasaanni erseqqinnerusumik misissuineq nakkutilliinnerlu uumasut nakorsaanerata aallartissavaa.

Imm. 2. Uumasut uumasuutiniit peerneqarnissaat, piffissamiluunniit erseqqinnerusumik aalajangiussaasumi uumasunit pineqartunit suliffeqarfimmiilluunniit tunisassiat peerneqarnissaat pillugu uumasut nakorsaanerata inerteqqummik nalunaaruteqarsinnaavoq.

Imm. 3. Nerisassiat isumannaatsuunissaat pisariaqartinneqarpat, imm. 1-mi misissuineq taaneqartoq tunngavigalugu uumasut nakorsaanerata uumasut pineqartut erseqqinnerusumik taaneqartumik sivisussusilimmik tigummigallarneqarnissaat aalajangiussinnaavaa.

§ 9. Uumasumut nakorsaatip atorreqareernerata kingorna tigummigallartitsinissamut piffissaliussatut aalajangiussaq suli qaangiussimannitsoq uumasunik toqoraavimmi pasitsaanneqarpat, toqoraanissaq kinguartinneqassaaq tigummigallartitsinissamut piffissaliussap qaangiunissaata tungaanut, takuulli imm. 2.

Imm. 2. Uumasup toqunneqarnissaata kinguartinnissaanut toqoraavik periarfissaqanngippat, imaluunniit uumasup atugarissaarnissaata pisariaqartippagu, tigummigallartitsinissamut piffissaliussap qaangiunnissaa sioqqullugu uumasup toqunneqarnissaa uumasut nakorsaanerata aalajangiussinnaavaa. Taamaattoqartillugu timaa igitassartaalu tigummigallarneqassapput, erseqqinnerusumik misissuisoqareernissaata tungaanut.

Nakorsaatinik inatsisitigut akuerisaanngitsunik katsorsaaneq

§ 10. Nakorsaatinik inatsisitigut akuerisaanngitsunik katsorsaasoqartoq paasineqarpat, imaluunniit tamatumunnga tunngavissaqartumik pasinartoqarpat, erseqqinnerusumik misissuinissat pisariaqartut uumasut nakorsaanerata aallartissavai, aamma makku ilanngullugit:

- 1) nakorsaatit timimi amiakkoqarnerannut patsisaasut kiisalu nakorsaatit inatsisitigut akuerisaanngitsut katsorsaatigineqarsimasut annertussusigiunnagaat paasiniarlugit uumasuutini aallaaviusuni misissuineq, aamma
- 2) nakorsaatit pineqartut aallaaviat aallaaviiluunniit pillugit misissueqqissaarneq.

Imm. 2. Misiligutissanik uumasut tigusiffigineqartut erseqqissumik nalunaaqutserneqassapput imaluunniit sorliussusersineqassapput. Qanorluunniit pisoqaraluarpat misissuinermit inernerit tiguneqartinnagit uumasuutinit qimagutsinneqannginnissaat nersutaatinik piginnittup akisussaaffigaa.

Imm. 3. Nakorsaatinik inatsisitigut akuerisaanngitsunik katsorsaasoqarsimasoq paasineqarpat uumasut pineqartut ingerlaannartumik toqunneqassapput uumasullu nakorsaanerata innersuussinera naapertorlugu suujunnaarsinneqassallutik. Uumasup toqunneqarnissaanut suujunnaarsinneqarnissaanullu, aamma toqoraavimmu, ikuallaavimmu assigisaanulluunniit assartorneqarnissaanut akisussaaffik taakkunungalu aningaasartuutit nersutaatinik piginnittup isumagisassarai.

§ 11. Uumasup nakorsaammik inatsisitigut akuerisaanngitsunik katsorsarneqarsimaneranik toqoraavimmi pasitsaassisoqarpat, pasitsaassineq taanna toqoraavimmi pisortat qullersaata uumasut nakorsaanerannut ingerlaannartumik nalunaartugissavaa, taannalu erseqqinnerusumik iliussissanik inassuteqassaaq, aamma ilanngullugit immikkut ittumik toqoraasoqassanersoq, uumasup timaanik igitassartaanillu tigummigallartitsisoqassanersoq imaluunniit misissugassanik tigusisoqassanersoq.

Uppernarsaaneq

§ 12. Uumasuutininik piginnittoq imaluunniit nersutaatinik piginnittoq nakorsaatinik tigummigallartitsinissamut piffissalersuinertalinnik atuiguni katsorsaaneranut tamanut ullut tamaasa nalunaarsuisassaaq:

- 1) Uumasut sorliit qanorlu amerlatigisut katsorsarneqarnerisut (paatsoorneqarsinnaanngitsumik sorliussusiliinerit imaluunniit tamanna ajornassappat amerlassutsit, oqimaassusiisa missiliorneri aamma uumasuusiviup immikkoortortaa imaluunniit assingusumik immikkoortiterisimaneq).
- 2) Katsorsaanerup ulloq aallartiffia naammassineqarfialu.
- 3) Katsorsaanerumut patsisaasoq.

- 4) Nakorsaat suna atorneqarnersoq.
- 5) Nakorsaammik annertussusiliineq qanorlu taanna tunniunneqassanersoq.
- 6) Katsorsaaneq kimit ingerlanneqarsimanersoq.

Imm. 2. Nalunaarsuinerit imm. 1-mi taaneqartut tamaasa ataatsimoortillugit takoriaannanngorlugillu sivikinnerpaamik ukiuni tallimani uumasuutunik piginnittup nersutaatinilluunniit piginnittup tigummissaavai, kiisalu piumaffigineqarnikkut uumasut nakorsaanut uumasulluunniit nakorsaanerannut takutittussaallugit tunniuttussaallugilluunniit.

Misissuineri aningaasartuutit

§ 13. Uumasunut nakorsaatit atorneqarnissaat pillugit malittarisassanik malinninnginneq misissuinermi paasineqarpat aningaasartuutit tamaasa uumasuuteqartup nersutaateqartulluunniit akilissaavai.

Pineqaatissiinerit

§ 14. §§ 7, 9, 10, imm. 2 aamma 3, § 11 aamma § 12, imm. 1, naapertorlugit aalajangersakkanik, imaluunniit § 8 imm. 2-mi inerteqqummik unioqquitsinerit akiliisitaanissamik pineqaatissinneqaataasinnaapput.

Nakkutilliineq

§ 15. Nakorsaatit pillugit peqqussummi § 25, imm. 3, oqaaseqatigiit aappaat naapertorlugu uumasut nakorsaanerat eqqartuussisumit aalajangiinertaqanngitsumik nakorsaataasivinnut, nunaateqarfinnut assigisaannullu isersinnaavoq nakorsaatinik uninngasuutunik nersutaatinillu misissuiartorluni.

Atuutilerfia

§ 16. Nalunaarut atuutilerpoq ulloq 1. januar 2006.

Namminersornerullutik Oqartussat, ulloq 14. november 2005

Asii Chemnitz Narup

/

Søren Rendal